

A' FIDI E U' LIGNU

Nanni l' orbu, 'a vista avia piddutu
duranti nu travagghiu fattu mali,
e notti e jionnu prigava u' Signuri
chi sta grazia ci avia a' ffari:
"a' vista i' llocchji m' aviti 'ffari aviri".

Ciancia da mattina a' sira
e nossi vulia pi' nenti rassignari.
Sintennu ca i vicini aviunu pinsatu
d'annari a' festa i' Riggio unn' a Madonna,
nci dissi a don Pippinu, sò cumpari,
si nu favuri ci putia fari.

"Cumpari, m' aviti a 'ffari stu' piaciri:
na scadda i lignu da' varetta m' aviti a puttari,
quannu annati 'nta Virgini a' salutari,
chi puru sta spirienza vogghiu pruvari".

"No dubitati, caru 'mpari Vanni,
chi sarannu rispittati i vostri cumanni".

Parteru tutti 'nsemi i paisani
supra nu barcuni pi' passari u' Strittu
e arrivari e' pedi i' Maria,
cu' gioia, firvuri e ran rispittu .

Si sà comu finisciunu sti diletta,
cantannu, manciannu e bivennu,
e s'accattaru puru i' friscaletti
i' Riggio canusciuti 'nta tuttu u' munnu .

Ripigghiaru u' barcuni tutti cuntenti
pi' ritunnari a' casa suddisfatti,
cu' alligria magari fussiru tantu stanchi .

Arrivati chi furunu 'nmenzu o' mari
don Pippinu s' arricuddavu da' prumissa,
chi, mischineddu, s'avia scuddatu,
e si sintiu assai frastunnatu :
"mali pi' mmia, e ora comu fazzu ?"

Si misi 'n confusioni povireddu
e no sapia chi pisci pigghjari .

Ma poi, pinsannu 'nta sò menti,
a manu 'nta sacchetta 'nfilavu
e u' cuteddu fora tiravu .

A 'mmucciuni, lentamenti scaddinavu
nu 'mossu i' lignu du' barcuni
e 'nta sò roba 'u nascunnivu .

Giunti chi furunu a Missina
u' cecu Nanni a' Pippinu ciccau :
" Mu puttastuvu chiddu chi v' avia dittu ?"
" Ca certu, 'mpari miu, eccu fattu "
e nci desi u' pezzu i' lignu da' barca .

Nanni, cu' affreu e tanta fidi
'nvucannu Maria si cunfurtavu,
asannu i' mani cu' divozioni,
'ddu mossu i' lignu all'occhi si purtavu .

Comu nu tronu a' celu apertu scuppiavu !
'Mpari Nanni all'istanti paria nu pazzu :
" Ci vidu, ci vidu ! ", gridava filici,
" A' Virgini Maria m' accuntintavu ! "

A' genti curria i' tutti i' parti
pi' chistu purtintusu avvenimentu
e a cettuni nci vinni puru u' svinimentu .

Don Pippinu chi sapia com'era u' fattu,
si fici a facci jianca comu a' cira,
paria nu mortu e era stirrifattu .

Si fici a' Cruci, dicennu tuttu meravigghiatu :

“ Fidi ti savva e no lignu i' barca ! ”

GIANNI MANGANO